



Mahein Nia Lian No. 29, 31 Janeiru 2012

Militar ho Polisia Bele Tuir Eleisaun ka Lae?

Introdusaun

Tuir konstituisaun Repúblika Demokratika de Timor-Leste tinan 2002, eleisaun jeral nu'udár prosesu soberania povu ida nian ne'ebé halo direta, livre, segredu no justu iha Republika Demokratika de Timor-Leste (RDTL). Wainhira realiza eleisaun jeral husi tinan ba tinan sempre hasoru problema ne'ebe la hanesan. Hahu husi eleisaun primeiru tinan 2001 mai to'o iha eleisaun jeral tinan 2007 liu ba, sempre hamosu problema ne'ebé interesante ne'ebé kria opiniaun publika hodi habiban debate publik entre sociedade timoroan ho internasional sira.

Relasiona ho prosesu eleisaun jeral tinan ida ne'e (2012), iha asuntu ida ne'ebé interesante tebes ba materia debate nian mak iha outoridade barak kestiona kona-bá instituisaun FALINTIL-Forsa Defesa Timor-Leste (F-FDTL) no institusaun Polisia Nasional Timor-Leste (PNTL), ne'ebe iha direitu atu involve direktamente hodi fo sira nia votu iha eleisaun jeral 2012 ne'e.

Iha publikasaun jornal diaria (nasional) *Suara Timor Lorosae* no *Diario Nasional* publika lia-foun (notisia) kona-bá membru F-FDTL no PNTL atu vota iha eleisaun jeral 2012. Sekretariu Estadu Defeza, Julio Tomas Pinto tatoli mensajem katak FALINTIL-FDTL nu'udár sidadaun, sira bele ezersisiu sira nia direitu vota iha eleisaun, tanba lei so kondena wainhira uza farda ba vota. Julio Tomas Pinto haktuir, "koalia kona ba votasaun hau laos koalia kona-bá partisipasaun politika pratika, nu'udár sidadaun sivil, sira partisipa. Maibé, nu'udár militar, sira la bele tuir tanba konstituisaun bandu."¹

Maibé, mosu hanoin halai naksalak malu husi Analizador Assuntu Estratejika no Internasional, Antonio Freitas² katak, lei la defini katak uza farda mak membru forsa F-FDTL no PNTL ba vota ka la uza farda mak ba vota. Tanba, tuir Antonio Freitas katak iha kontradisaun entre lei ne'e rasik tanba iha parte ida lei la permiti membru forsa F-FDTL/PNTL atu vota iha eleisaun maibe iha lei seluk fo direitu ba sidadaun hotu-hotu atu ba vota iha festa demokrasia.³

Kondisaun sosial-politika iha Timor-Leste ohin leron no tinan 10 ka 15 ba oin, membru F-FDTL no PNTL lalika utiliza lai sira nia direitu vota nian iha eleisaun, tanba iha membru F-FDTL ka elementu PNTL barak mak sei adere-an makaas bá partidu politika balun. Membru F-FDTL no PNTL balun ladauk bele husik sira nia relasaun emosional ho partidu balun tanba (1) razaun iha relasaun ideolojia iha pasadu⁴ no (2) Timor-Leste seidauk iha alterasaun lei ida atu limita sidadaun balun tanba sira nia kna'ar ezersisiu hanesan ema ne'ebe halo nia funsaun atu aseguira sidadaun hotu-hotu atu tuir festa demokrasia.⁵

¹Lei La Bandu Forsa Armada Vota, Jornal Suara Timor Lorosae, edisaun 06/10/2011.

²Dili Institute for Peace Studies' Direktor,06/1/2012

³Intervista ho Analizador Assunto Estratejika no Internasional, Antonio Freitas iha Dili, 20 de Dezembru 2011.

⁴Intervista ho Observador Sosial Politika, Filipe Rodrigues husi via internet iha Dili dia, 19 Dezembru 2011.

⁴Konsitusaun Republika Demokratika de Timor-Leste tinan, 2002.

⁵Intervista ho Observador Politika Militar Matias Voavida iha Dili, dia 20 de Dezembru 2011.

Maske mosu pro no kontra iha sositidade nia le'et maibé durante ne'e membru F-FDTL no PNTL uza ona sira nia direitu nu'udár sidadaun Timor-Leste hodi ba vota iha kualker eleisaun hahu husi eleisaun 2001 no eleisaun 2007. Tanba sa mak agora sai polemika hodi hamosu pro no kontra iha publiku sai debate nasional?

Tuir Fundasaun Mahein katak, polemika ne'e mosu tanba hafoin de krizi 2006 ema hotu kestiona katak krize 2006 nudar "krizi politika militar" ne'ebé lori publiku moris iha trauma nia laran tanba agora foin mak tama ba faze re-dezenvolve hikas institusaun F-FDTL no PNTL. Razaun tsamba krizi 2006 nia tensaun seidauk lakon iha povu nia hanoin sa-tan lideransa ne'ebe mak involve direta no indereta iha krizi 2006 sei lao livre hela.

Pro no Kontra Membru F-FDTL no PNTL Tuir Vota

FALINTIL-Forsa Defesa Timor-Leste (F-FDTL) no Polisia Nasional Timor-Leste (PNTL) nu'udár forsa nasaun nian (*Patrimoni Estadu*) atu garante estabilidade soberania nasaun Timor-Leste husi ameasa ne'ebé mai husi rai liur no ameasa husi rai laran. Tuir Konstituisaun RDTL artigu 146 ho artigu 147, F-FDTL sei proteze povu tomak husi ameasa ne'ebé mai hus liur, no PNTL mak sei fo garantia ba direitu no liberdade ba populasaaun tomak no fo siguransa ba sidadaun ida-idak nia vida no nia bens no propiedades.⁶

Iha fulan hirak liu ba, mosu opiniaun pro no kontra relasiona ho direitu vota ba membru FALINTIL-Forsa Defesa Timor-Leste (F-FDTL) no Polisia Nasional Timor-Leste (PNTL) iha kualker eleisaun ne'ebe halao iha Timor-Leste.

Pro no kontra husi komunidadade ne'ebé hamosu perguntas wain ne'e, kria hela perguntas ba Fundasaun Mahein; Bele ka lae, membru forsa F-FDTL no PNTL bele vota iha eleisaun ruma? Relatoriu FM ne'e laos atu responde ba pro-kontra no perguntas hirak ne'ebé mak mosu maibé FM hakarak mos kria debate publiku ne'ebé diak no konstrutivu iha setor defeza no siguransa nian.

FM tetu no hare katak, wainhira krizi politika militar mosu iha 2006 ne'ebé konsege halo instituisaun F-FDTL no PNTL monu ba iha konflitu nia laran no habiban hanoin ida katak, F-FDTL ho PNTL atu uza sira nia direitu nu'udár sidadaun atu vota iha eleisaun jeral 2012 ne'ebé atu realiza iha tempu badak ne'e.

Tanba krizi 2006 ne'ebé liu ba ne'e, too oras ne'e sai preukupasaun boot nafatin ba publiku atu buka hatene medida saida mak intitusaun F-FDTL no PNTL foti hodi hasoru eleisaun jeral iha 2012. Krizi politika militar ne'ebé mak institusaun F-FDTL no PNTL hasoru iha biban ne'ebá, bele afeta mos ba kada membru ida-idak nini desizaun politika durante iha eleisaun.⁷ Tanba ne'e, tenki fo edukasaun sivika ba membru F-FDTL no PNTL importante tebes, tanba eleisaun 2012 hanesan eleisaun ne'ebé difirente ho eleisaun 2001 no eleisaun 2007.

Perguntas importante husi Fundasaun Mahein katak; (1) Oin nusa halo perparasaun individual ba membru F-FDTL no PNTL atu tuir votasaun? Institusaun F-FDTL ho PNTL (2) hetan ona edukasaun sivika iha kurikulu edukasaun polisia (akademia polisia) no edukasaun militar (akademia militar) nian durante ne'e ka lae? Bele ka lae, (3) membru F-FDTL no

⁶ Diskursus Permeru Ministru Xanana Gusmao iha Reflesaaun ba F-FDTL/PNTL iha Dili Convention Senter, Dili, 05 de Janeru de 2012.

⁷ Entrevista ho Observador Politika Militar, Matias Voavida iha Dili, dia 20 de Dezembru de 2011.

PNTL atu identifika sira nia-an hanesan membru F-FDTL no PNTL no sidadaun wainhira ba vota?

Wainhira maturidade politika la mosu iha prosesu demokrasia ne`ebe halo iha eleisaun nia laran mak hamosu fali emosaun politika entaun instituisaun rua hanesan F-FDTL ho PNTL la bele garante ona siguransa nasional iha Timor-Leste.

Tuir FM nia hanoin katak, importante atu membru ne`ebe mak atu tuir votasaun tenki hatene funsaun nu`udár militar no funsaun nu`udár sidadaun. Karik sira la bele halo separasaun ba militar ho sivil entaun ne`e sei sai ameasa bá prosesu demokrasi ne`e rasik. Tanba ne`e, FM rekomenda ba governu atu kria uluk kondisaun ne`ebe diak ba membru F-FDTL no PNTL antes estadu fo diretu vota ba sira uza tuir konstituisaun nia haruka.

Iha Konstituisaun RDTL artigu 47 direitu ba sufraju, iha alinea 1 hatete sidadaun ida-idak ho tinan 17 anu selijeble ona atu vota iha eleisaun, no artigu 46 sobre Direitu ba Partisipasaun iha politika. Iha kapitulu 2 dehan, sidadaun hotu-hotu iha direitu atu halo no partisipa iha partidu politiku sira.⁸

To`o agora, hanesan nasaun Indonezia ne`ebe mak ukun-an tinan 67 ona maibe sira sei halo limitasaun ba membru militar no polisia atu tuir eleisaun. Governu Indonezia seidaok fo atuorizasaun tanba instituisaun rua ne`e tenki perpara-an sai ema ne`ebe profesional hodi halo sira nia kna`ar ho neutralidade. Ne`eduni, atu mantein neutralidade militar ho polisia la bele tuir eleisaun tanba sira kuandu tuir eleisaun, sira la neutru ona. La neutru tanba militar no polisia tenki hili kandidatu prezidenti ne`ebe independente no kandidatu ne`ebe mai husi partidu politika ruma.

Direitu Vota Tuir Konstituisaun RDTL 2002

Timor-Leste nu`udár pais demokratika fo biban ba sidadaun hotu-hotu iha direitu hanesan tuir konstitusaun haruka. Membru F-FDTL no PNTL iha direitu atu vota iha kualker eleisaun ne`ebe halao iha rai laran, tanba membru F-FDTL no PNTL sira mos hanesan sidadaun ne`ebe sira nia direitu prevé ona iha lei inan.⁹ Ne`eduni, forsa defeza no forsa siguransa mos nu`udár sidadaun Timor-Leste ne`ebe mak tinan boot liu 17 mos iha direitu atu vota iha eleisaun tanba garante ona iha konstituisaun RDTL.

Nu`udár sidadaun ida iha dereitu prerogativa atu hili kualker partidu politika ida tuir sira nia hakarak, maibe karik membru hirak ne`e iha intensaun atu fo influencia ba ema seluk atu vota tuir sira nia hakarak, ne`e mak labele tanba sira kaer kroat.¹⁰ Ironiku liu mak membru PNTL ho F-FDTL ne`ebe nu`udár eskoltu ba VIP sira no mos ba prezidente partidu politika. Pesoal siguransa hirak ne`e kleur tebes tuir no dala barak eventu partidus nian tanba sira fo siguransa ba lider partidu nian. Entaun sira mos influenciadu los atu vota ba partidu ida ne`ebe lora-lora sira rona husi lider politika ne`ebe sira proteje no fo siguransa ba. Se nune`e, FM preukupa katak pesoal siguransa hirak ne`e la neutru ona.

Koalia konaba direitu vota sidadaun nian, sobre artigu 47.1 Konstituisaun RDTL hamosu kontradisaun bo`ot. Iha kontradisaun bo`ot tanba direitu nu`udár buat ida fakultativu “bele uza ou la uza” la`os problema. Iha artigu 47.2 mos hateten direitu vota ne`e nu`udár obrigasaun ba sidadaun ida atu utiliza, katak direitu nebe`e nu`udár buat ida fakultativu sai tiha mos buat ida imperativu katak “la bele la halo”, tenki halo. Tenki utiliza direitu vota ne`e

⁸Konstitusaun Republika Demokratika de Timor-Leste tinan, 2002.

⁹Franquilino da Costa Observador Politika Militar, Membru F-FDTL no PNTL iha Direitu vota ba Eleisaun, iha Jornal Suara Timor Loro Sae Edisaun, Segunda, 03 de Outubru de 2011.

¹⁰ Intervista ho Membru Parlamentu Nasional komisaun B asuntu defesa seguransa no estrajerus, David Dias Ximenes iha Parlamentu Nasional, Dili, 20 de Dezemburu de 2011.

mak hamosu kontradisaun. Konstituisaun dalaruma kahur aspetu fakultativu no imperativu ba asuntu ida deit.¹¹

Karik ita la konkorda ho membru F-FDTL no PNTL uza sira nia direitu atu tuir vota iha eleisaun hanesan ita dudu ses ona F-FDTL no PNTL husi prosesu demokrasia? Los duni katak, F-FDTL no PNTL nudar politika soberania laos politika partisan. Maibé, politika sobrania F-FDTL no PNTL laos atu halakon fali direitus humanu membru F-FDTL no PNTL atu uza sira nia direitu atu vota.

Neutralidade Membru F-FDTL no PNTL

Hakbi'it nafatin komitmentu neutralidade membru F-FDTL no PNTL iha vida politika praktis, agora ne'e improtante atu halo tanba membru F-FDTL no PNTL hanesan guarda siguransa defeza soberania. Neutralidade membru F-FDTL no PNTL presiza tebes atu fo siguransa ba prosesu demokrasia no aseguru prosesu denzenvolvimentu povu no soberania iha tempu agora atu sai diak nafatin. Institusaun F-FDTL no PNTL atu labele involve iha partidu politika atu nune'e hatudu neutralidade iha povu nia le'et iha eleisaun jeral mai (2012) nee.¹²

Iha Konstituisaun RDTL artigu 146 kona-bá forsa armada alinea 3 mos dehan katak, FALINTIL-FDTL labele involve iha partidu politika no tenki obedese ba órgaun soberanu kompetente sira, nu'udar konstituisaun no lei, no labele iha intervensaun politika ida.¹³ Atu kria neutralidade, imparcialidade mak baze baziku ba hahalok sosial no politiku husi membru F-FDTL no PNTL tanba F-FDTL no PNTL mak garantia ba sigurasa estadu nian, F-FDTL no PNTL mak garantia ba estabilidade nasaun nian, no F-FDTL no PNTL mak garantia ba konfiansa iha povu nia moris. PM Xanana Gusmão dehan, institusaun F-FDTL no PNTL, tenki buka hamutuk atu hatene no kumpriende saida mak konseptu soberania, hodi nune'e estadu no povu tomak bele iha konfiansa ba politika siguransa.¹⁴ Kkarik nune'e, atu garantia estabilidade no imparcialidade iha serbisu siguransa ba estadu ho nasaun, tan sa maka membru institusaun F-FDTL ho PNTL tenki tuir vota iha eleisaun? Perguntas ba ita hotu atu bele debate karik Timor-Leste nia situasaun politika bele ona ka lae fo lisensa livre ba membru institusaun siguransa atu ba svota?

Konstituisaun RDTL fo biban ba ninia sidadaun tomak iha direitu atu vota iha eleisaun nu'udár direitu sidadaun nian. Intermus de politika, ema bolu dehan vota iha eleisaun nu'udár direitu politika. Tanba, bainhira ba vota membru F-FDTL no PNTL sira involve-an ona iha partidu politika tanba sira uza sira nia direitu politika atu vota ba partidu politika ida iha eleisaun parlamentar no mos vota ba lideransa politika iha eleisaun presidencial. Entaun, iha pontu ida ne'e, membru F-FDTL no PNTL ses ona husi konseptu neutralidade no la tuir mos konstituisaun tanba iha konstituisaun rasik hatete katak, membru F-FDTL labele mete iha partidu politika.

Entretantu, tuir lei organika F-FDTL iha artigu 1 koalia kona-bá natureza ho misaun ne' ebe esplika klean liu iha kapitulu 2 dehan, F-FDTL rigirozamente apartidária i ninia organizasaun mesak ida de'it ba nasaun tomak. No, iha kapitulu 3 mos dehan katak, membru F-FDTL nian, iha kualkér grau ka kategoria, labele partisipa direta ka indiretamente, iha atividade politika sira.¹⁵ Lei ne'e la garante para membru F-FDTL atu halo pratika politika, maibé

¹¹ Entrevista ho Observador Sosial Politika, Filipe Rodrigues husi via internet iha Dili dia, 19 Dezembru 2011.

¹² PM Xanana Gusmau Husu F-FDTL ho PNTL Labele Involve Partido Politika, Jornal Diario nasional Edisaun, 06 de Janeiru de 2012.

¹³ Konstitusaun Republika Demokratika de Timor-Leste tinan, 2002.

¹⁴ Diskursus Permeru Ministru Xanana Gusmao iha Reflesau ba F-FDTL/PNTL iha Dili Convention Senter, Dili, 05 de Janeru de 2012.

¹⁵ Statuto FALENTIL-FDTL dekretu Lei No/ 2006

partisipasaun politika la difini iha lei nee.¹⁶ Ovservador sosial politika, Filipe Rodrigues hatete, diak liu membru F-FDTL no PNTL lalika utiliza lai sira nia direitu vota nian iha eleisaun agora (2012).¹⁷

Nune'e mos iha lei organika F-FDTL ne'e mos sei la fo dalan ba membru F-FDTL atu vota iha kualker eleisaun tantu eleisaun prezidensial no eleisaun parlamentar. Tanba sira tuir vota iha eleisaun otomatikamente sira tama ona iha kategoria partisipa direta iha atividade politika ne'ebé lei organika ne'e la fo dalan ba membru F-FDTL sira atu tuir vota.

Problema hanesan mosu mos iha instituisaun PNTL. Membru Polisia Nasional Timor-Leste (PNTL) ne'ebé nu'udár sidadaun Timor atu vota mos iha eleisaun 2012. Instituisaun PNTL nia problema hanesan mos F-FDTL ne'ebé lei mak sei sai kontradisaun. Hanesan hakerek ona iha konstitusaun RDTL 2002 iha artigu 147 kona-bá polisia no forsa ba siguransa ne'ebé esplika iha kapitulu 1 dehan; Polisia defende legalidade demokrátika no garante sidadaun sira nia siguransa interna no labele involve iha partidu polítika.¹⁸

Iha lei organika PNTL artigu 1 natureza no misaun nebe esplika iha kapitulu 3 dehan, PNTL independente no hala'o nia knaar eskluзивu ba estadu.¹⁹ Konseptu Independente hatete katak tenki iha klaran deit. Intermus de politika, membru PNTL la bele vota iha eleisaun jeral tanba wainhira membru PNTL vota iha eleisan entaun sira tenki hili kualker partidu ida. Iha parte ida ne'e, hatudu katak PNTL la iha ona independensia iha kualker eleisaun.

Hare ba kestaun ne' e, karik governu bele halo limitasaun ba membru F-FDTL no PNTL nia direitu atu tuir eleisaun, karik sira seidauk profesional tau sira nia-an iha fatin. Ne'eduni, nu'udár membru F-FDTL no PNTL tenki halo nia knaar hanesan ema ne'ebé professional no bainhira halo sira nia knaar hanesan sivil entaun sira mos ema sidadaun baibain. Ida ne'e mak ita susar atu halo separasaun entre ema militar no sivil.

Tanba ne'e, Fundasaun Mahein husu katak to'o ona iha ne'ebé membru institusaun rua ne'e nia profesionalizmu. Tuir FM katak karik institusaun F-FDTL no PNTL seidauk profesional tanba ne'e tenki perpara uluk sira sai professional lai antes haruka sira hodi uza sira nia direitu ba vota. Se karik membru F-FDTL no PNTL seidauk professional mak tuir eleisaun bele mos kria problema entre institusaun rua ne'e, tanba sei iha partidu politika ou lideransa politika balu mak sei tenta komando F-FDTL no PNTL atu suporta sira. Karik ne'e mak akontese, atuasaun nebe mak membru F-FDTL no PNTL halo sei la neutru ona. Tanba hakarak ka lakohi sira sei adere-an ba partidu politika ou lideransa ne'ebé mak halo ona komprimisu politika ho sira.

Iha problema seluk mak lideransa balu reforma husi militar no depois kandidata-an atu kompete iha eleisaun jeral hanesan Xanana Gusmão (2001) no Taur Matan Ruak iha 2012 daudaun ne'e. Realidade hatudu katak iha mos eis militar balun lidera partidu politika no iha mos lideransa ne'ebé reforma husi komando PNTL mos ativu hela iha partidu politika balun. Pior liu tan, membru institusaun F-FDTL no PNTL, dala ruma sira nia membru ba rejistu sai militante partidu ruma ho hatais farda, maske PM Xanana Gusmão fo atensaun ba membru F-FDTL no PNTL atu labele involve iha partidu politika hodi hatudu neutralidade ba povu.²⁰ Maibé, realidade hatudu katak membru F-FDTL no PNTL balun sei hatais farda militar nian mak ba rejistu sira nia naran atu sai militante ba partidu politika balun.

¹⁶ Entrevista ho Analizador Assunto Estratejika no Internacional, Antonio Freitas iha Dili, 20 de Dezembru 2011.

¹⁷ Entrevista ho Observador Sosial Politika, Filipe Rodrigues iha Dili, dia 19 de Dezembru de 2011.

¹⁸ Konstitusaun Republika Demokratika de Timor-Leste tinan, 2002.

¹⁹ Lei Organika Polisia Nasional Timor-Leste dekretu Lei No. 09/2009.

²⁰ PM Xanana Husu F-FDTL ho PNTL Labele Involve Partido Politika, jornal Diario Nasional, edisaun 06 Janeiru 2012.

Tanba ne'e, wainhira fo'o fatin ba membru F-FDTL no PNTL uza sira nia direitu vota nian maka psikolojikamente fo biban ba membru F-FDTL no PNTL atu haburas nafatin sentimentu ownership (rasa memiliki) ba partidu politika ida iha sira nia moris lor-loron.²¹

Karik membru F-FDTL no PNTL iha deritu atu partisipa iha eleisaun jeral, sira sei iha sentimentu solidaridade nu'udár militar ka polisia no sentimentu fanatizmu ne'ebé makaas ba lideransa ho partidu politika balu. Lideransa instituisaun rua ne'e maksimalmente ladauk halo esforsu ne'ebé naton atu dudu elementu sira hodi la hahi demais partidu balun iha sira nia moris.²² Seidauk tan ho sistema komando ne'ebé mak militar ho polisia sira uza bele sai hanesan ekipa ka fatin atu mobiliza votus. Membru F-FDTL no PNTL ida bele fo influensia ba vontante iha familia no uma laran atu vota ba ema ne'ebé hanesan.²³

F-FDTL no PNTL iha Eleisaun 2001

Iha eleisaun geral 2012 ne'e, membru instituisaun F-FDTL no PNTL tuir eleisaun jeral ba daruak ona. Eleisaun ba dahuluk maka eleisaun geral 2001. Ho eleisaun 2012 ne'ebé mak sei realiza iha tempu badak ne'e, loke espasu bo`ot ba membru instituisaun F-FDTL no PNTL atu involve mos iha prosesu festa demokrasia ne'ebé mak tinan lima ita selebra dala ida. To`o agora seidauk mosu probema ruma ne'ebé grave kona-bá F-FDTL no PNTL uza sira nia direitu vota iha eleisaun.

Maibé, iha possibilidade boot bele mosu problema iha futuru tanba instituisaun siguransa F-FDTL no PNTL seidauk professional halo sira nia funsaun nu'udár militar no funsaun nu'udár sidadaun sivil, wainhira sira partisipa iha eleisaun jeral. Wainhira maturidade politika seidauk iha ka seidauk mosu iha prosesu demokrasia liu husi eleisaun prezidensial no parlamentar nia laran, mak mosu psikolojia politika ka emosaun politika ne'e mosu entaun instituisaun F-FDTL no PNTL sei la garantia siguransa nasional iha eleisaun jeral.²⁴

Entretantu, tuir observador sosial politika, Matias Boavida katak membru instituisaun siguransa F-FDTL no PNTL bele vota iha eleisaun maibé to`o ona iha ne'ebé sira nia profesionalizmu. Karik membru F-FDTL no PNTL seidauk profesional iha sira nia knaar tenki halo lei ruma atu limiti sira nia direitu atu bele minimiza sira nia neutralidade no parsialdade husi F-FDTL no PNTL.

Maibé, karik F-FDTL no PNTL hetan autorizasaun husi governu atu tuir eleisaun, Fundasaun Mahein rekomenda deit atu kria regulamentu ne'ebé forte hodi kesi metin instituisaun F-FDTL no PNTL atu halo sira nia funsaun nu'udár forsa siguransa ne'ebé professional. FM mos husu atu halo uluk revizaun ba lei organika F-FDTL artigu 1 no lei Organik PNTL artigu 1 tanba iha lei organika instituisaun rua ne'e la autoriza nia membru sira vota iha kualker eleisaun jeral.

Iha problema seluk ne'ebé mak FM hakarak sujere, karik membru F-FDTL no PNTL tuir eleisaun, se mak atu halo siguransa wainhira prosesu eleisaun ne'e lao iha teritoriu. Se karik membru F-FDTL no PNTL tuir eleisaun sei fo impaktu direta ba setor siguransa iha eleisaun jeral tanba ema ne'ebé mak iha intensaun la diak bele kria instabilidade hodi kria konfliktu entre comunidade hodi halo foer prosesu demokrasi iha Timor Leste.

²¹ Entrevista ho Observador Sosial Politika, Filipe Rodrigues husi via internet iha Dili dia, 19 de Dezembru de 2011.

²² Entrevista ho Observador Sosial Politika, Filipe Rodrigues husi via internet iha Dili dia, 19 de Dezembru de 2011.

²³ Entrevista ho Observador Sosial Politika, Filipe Rodrigues husi via internet iha Dili dia, 19 de Dezembru de

²⁴ Entrevista ho Analizador Assunto Estratejika no Internasional, Antonio Freitas iha Dili, 20 de Dezembru 2011.

Tanba ne'e, Fundasaun Mahein rekomenda ba governu no parlamentu nasional atu halo lei ida hodi regula membru F-FDTL no PNTL atu ba vota uluk loron ida antes eleisaun jeral, hodi nune'e membru F-FDTL no PNTL bele halo siguransa iha eleisaun jeral. Maibe, FM mos hamosu fali perguntas ida, katak karik membru F-FDTL no PNTL vota loron ida antes eleisaun entaun se mak halo siguransa ba institusaun defeza no siguransa ne'e?

Impaktu Membru F-FDTL no PNTL Tuir Vota ka Lae

Hanesan temi ona kestaun lubuk ida iha leten katak, bainhira membru F-FDTL no PNTL sira hetan mos direitu bele vota hanesan sidadaun sira seluk, bele loke espasu boot ba politika professional atu politiza membru no institusaun rua ne'e. Sei mosu tentasaun husi ema politika nain sira koko hodi rekruta atu halo kompromisu politika entre lideransa politika ho membru F-FDTL no PNTL. Kuandu ne'e akontese entaun sei fo impaktu ba instabilidade nasional tanba karik mosu problema ruma institusaun rua ne'e sei la neutru tanba sira adere ona ba lideransa ou partidu politika balun.

Problema seluk mak halo institusaun rua ne'e sei la garante eleisaun jeral ho masimu tanba numeru PNTL sei minimu liu atu halo siguransa ba sentru votasaun ne'ebé mak hamutuk 630 iha Timor laran tomak ho membru PNTL agora foin total hamutuk 2200 ne'ebé sei aloka kada membru PNTL sira ba fo siguransa ba sentru votasaun. Difikuldade seluk mak membru PNTL sira ne'e atu vota, sira tenki ba troka farda militar hodi hatais sivil mak hafoin bele tuir votasaun ne'e, bele difikulta sira nia rotasaun ne'ebé sira aplika.

Demokrasia fo biban ba membru F-FDTL no PNTL bele tuir eleisaun hatudu katak sira sei la lakon sira nia direitu nu'udár sidadaun ida tanba demokrasia sira mos hetan liberdade iha direitu politika hodi ba vota. Demokrasia fo espasu ba institusaun rua ne'e hodi partisipa no hili lideransa masimu no partidu politika sira atu lidera estadu no governu, ho nune'e demokrasia mos fo espasu ba institusaun militar ho polisia hodi sira bele partisipa iha eleisaun jeral.

Konkluzau

Institusaun F-FDTL no PNTL nu'udár instrumentu soberania ne'ebé halo sira nia funsaun ida ke boot iha setor defeza no siguransa. Falentil-Forsa Defesa Timor-Leste (F-FDTL) nu'udár instrumentu soberania ne'ebé iha poder tomak atu halo guarda ba defeza nasaun Timor-Leste. Nune'e mos Polisia Nasional Timor-Leste (PNTL) nu'udár instrumentu ne'ebé ho nia funsaun atu fo siguransa ba povu Timor Leste. Institusaun rua ne'e, nia papel atu fo siguransa no defeza ba povu, ne'eduni F-FDTL no PNTL mos tenki serbisu hamutuk no suporta malu iha area defeza no siguransa nian.

Pro no kontra ne'ebé mosu kona-bá F-FDTL no PNTL atu vota iha eleisaun 2012, nu'udár parte ida mai husi dinamika demokrasia nian. Maske nune'e, implementasaun prosesu demokrasia mos la bele kontra fali prinsipu importante seluk iha demokrasia nia laran hanesan prinsipu justu, neutralidade ho imparcialidade. Neutralidade no imparcialidade F-FDTL no PNTL importante hodi garante stabelidade iha Timor-Leste. Tanba neutralidade no imparcialidade ne'e rasik mos sai sasukat ida hodi hasa'e profesionalizmu internal F-FDTL no PNTL. Ne'e hanesan obrigasaun profesionalizmu hanesan hakerek ona iha lei organik F-FDTL no PNTL nian rasik.

Natureza ho misaun iha lei organika F-FDTL artigu 1 sobre natureza no esplika iha kapitulu 2 dehan F-FDTL rigirozamente apartidária i ninia organizasaun mesak ida de'it ba nasaun tomak. No, iha kapitulu 3 dehan, membru F-FDTL iha kualkér grau ka kategoria, labele partisipa direta ka indiretamente iha atividade política sira.²⁵ Nune'e mos lei organiku PNTL hatete katak, natureza no misaun nebe esplika iha lei organika ne'e dehan PNTL independente no hala'o nia knaar eskluзивu ba estadu.²⁶ Bazeia ba Lei Organika F-FDTL, entaun membru F-FDTL tenki lolos hatuur sira nia-an iha pozisaun independente hodi hasoru prosesu eleisaun iha Timor-Leste.

Rekomendasaun

Tanba ne'e, ba governu Timor Leste no parlamentu nasional, ba partidu politika no instituisau F-FDTL no PNTL, Fundasaun Mahein rekomenda;

1. Ba Institusaun F-FDTL no PNTL atu hasae edukasaun sivika iha akademia polisia no akademia militar atu kumpriente separasaun entre militar ho sivil.
2. Ba governu no Institusaun F-FDTL/PNTL atu perpara kondisaun ne'ebé diak ba membru F-FDTL no PNTL atu bele uza sira nia direitu ba vota iha eleisaun ho diak.
3. Ba governu ho parlamentu nasional liu-liu Komisaun B atu halo draf lei ida hodi fo dalan ba membru institusaun F-FDTL no PNTL ba vota uluk lora ida antes eleisaun jeral hahu, atu iha eleisaun tuir mai ba publiku, institusaun rua ne'e bele fo siguransa ho masimu.
4. Ba institusaun F-FDTL/PNTL atu labele loke-an atu ema politiza institusaun.
5. Ba Lideransa politika sira atu labele koko hodi rekruta membru ou lideransa sira iha institusaun F-FDTL/PNTL nia laran.
6. ba Institusaun F-FDTL no PNTL atu mantein nafatin profesionalizmu nudar forsa defesa no forsa de siguransa.
7. Baa institusaun F-FDTL no PNTL atu halo siguransa iha eleisaun ho neutralidade ho parsialidade.

²⁵Statuto FALENTIL-FDTL dekretu Lei No/ 2006.

²⁶Lei Organika Polisia Nasional Timor-Leste dekretu Lei No. 09/2009.

FONTES:

Intervista

Intervista ho Membru Parlamentu Komisaun B, David Dias Ximenes iha Dili, dia 20 de Dezembru de 2011.

Intervista ho Observador Politika Militar, Matias Boavida iha Dili, dia 20 de Dezembru de 2011.

Intervista ho Analizador Assunto Estratejika no Internasional, Antonio Freitas iha Dili, 20 de Dezembru 2011.

Intervista ho Observador Sosial Politika, Filipe Rodrigues husi via internet iha Dili dia, 19 Dezembru 2011.

Diskursus Primeiru Ministru Xanana Gusmao iha Reflesaun ba F-FDTL no PNTL iha Dili Convention Senter, Dili, 05 de Janeru de 2012.

Lei sira

Konstitusaun Republika Demokratika de Timor-Leste tinan, 2002.

Statutu FALINTIL-FDTL dekretu Lei No/ 2006

Lei Organika Polisia Nasional Timor-Leste dekretu Lei No. 09/2009.

Jornal

Membru F-FDTL no PNTL iha Direitu vota ba Eleisaun, Jornal Suara Timor Loro Sae Edisaun, Segunda, 03 de Outubru de 2011.

PM Xanana Gusmau Husu F-FDTL ho PNTL Labele Involve Partido Politika, Jornal Diario nasional Edisaun, 06 de Janeiru de 2012.

Lei La Bandu Forsa Armada Vota, Jornal Suara Timor Lorosae, edisaun 06 de Otubru de 2011.